

摘藻堂四庫全書薈要

集部

欽定四庫全書薈要

集部

漢魏六朝百三家集卷一百十一中



詳校官候選知縣臣吳甸華

欽定四庫全書薈要卷一萬九千七百五

集部

漢魏六朝百三家集卷一百十一中

明 張溥 輯

庾信集二

序

趙國公集序

竊聞平陽擊石山谷為之調大禹吹筠風雲為之動與
夫含吐性靈抑揚詞氣曲變陽春光廻白日豈得同年

而語哉柱國趙國公發言為論下筆成章逸態橫生新
情振起風雨爭飛魚龍各變方之珪璧塗山之會萬重
譬似雲霞赤城之巖千丈文參厯象即入天官之書韻
涉絲桐咸歸總章之觀論其壯也則鵬起半天語其細
也則鷦巢蚊睫豈真熊熊旦上增城抱日月之光燄燄
霄飛南斗觸蛟龍之氣昔者屈原宋玉始於哀怨之深
蘇武李陵生於別離之世自魏建安之末晉太康以來
雕蟲篆刻其體三變人人自謂握靈蛇之珠抱荆山之

玉矣公斟酌雅頌諧和律呂若使言乖節目則曲臺不
顧聲止操縵則成均無取遂得棟梁文囿冠冕詞林大
雅扶輪小山承蓋

碑

陝州弘農郡五張寺經藏碑

蓋聞如來說法萬萬恒沙菩薩轉輪生生世界豈直優
波提舍祇夜修多而已哉是以熙連禪河質多羅樹七
處八會三清四說皮紙骨筆木葉山花象鼻之所未勝

龍藏之所不盡雖復銀函東度金甌南翻秦景遙傳竺
蘭私記譬猶海水之一珠不下崑山之片玉若夫法雲
深藏師子雷音梵志往生聲聞說戒雪山羅漢之論驚
嶺菩提之法本無極際何可勝言弘農五張寺者南陽
張元高寓居此地昔者千金之族見徙五陵大姓之民
移家六郡蓋其流也元高五子負荷遺訓離經辨志竝
是成名入室生光咸能顯德加以尊承慧業敬受法門
兄弟同居共捨為寺伽藍肇建即以五張為名是知城

居趙信仍名趙信之城殿入蕭何即號蕭何之殿加以
象馬無愆衣裘是捨春園柳路變入禪林蠶月霜津迴
成定水平輿雖盛豈可獨擅二龍扶風最良不得專稱
五馬寺主三藏大法師法映邑主洛州刺史張隆等財
行法檀身心罄竭兼化鄉邑道俗數千敬造一功德輪
見成三百餘部琅笈雲書金繩玉檢削蒸栗之簡裝酸
棗之珠竝入香城咸封禪閣坐堂伏檻羗非湘水之神
綠房紫的足擬恭王之殿高掌西望長河北臨鼎氣常

浮爐烟咸起戶牖寥廓吹萬龍門之風梁棟崢嶸落實
河源之樹僧徒雲集不遠燉煌之城學侶相奔更合華
陰之市兩陝昔分實基王化二陵今阻翻馳羽檄虞公
屈產交亂風塵召伯甘棠凋零霜露雖復兼能共治未
遣渡河之獸烽析是警實擾移關之民是以法王御世
天人論道汲引四流周圓五怖故能調伏怨憎消除結
縛法水津梁得無砥柱之難香山轍迹非復終南之險
天子命我試守此邦墨竈未黔孔席無煖纔臨都尉之

境即有樓船之役既而南風不競北道言旋幕府既開
邦君且止鄉俗耆老依然此別屬茲法事須余制文聊
以課虛為銘云爾

舍衛之國祇洹之園三明極地八會窮源連河競說勝
辯爭論波提東度祇夜南翻非空即色離有無言達人
止是獨悟重昏身雖繫馬心避騰猿禪樓却月義殿翔
鷗迴風香蓋反露珠幡西臨砥柱東背輶轅河鳴陽硤
山響蘇門翔禽歌嘯流澗絃喧度河餘獸移關舊村昔

為畿服今成塞垣城疑廣武地似樓煩燿烽並照象馬
單奔無鍾襲莒有雨圍原不資十方誰釋三怨風傾地
柱火及天元銀鈎永固金牒長存封君馬首方事南蕃
言從楊僕請謝劉昆

溫湯碑

咸池浴日先應錄甲之圖砥柱浮天始受玄夷之命仁
則滌蕩埃氛義則激揚清濁勇則負山餘力弱則鴻毛
不勝仲春則榆莢同流三月則桃花共下其色變者通

為五雲之漿其味美者結為三危之露煙青於銅浦色
白於鉛溪非神鼎而長沸異龍池而獨涌灑胃滯腸興
羸起瘠秦皇餘石仍為鴈齒之階漢武舊陶即用魚鱗
之瓦山間湧水實表忠誠室內江流彌彰純孝豈若醴
泉消疾聞乎建武之朝神水蠲疴在乎咸康之世嵩岳
三仙之館不孤擅於天池華陰百丈之泉豈獨高於蓮
井

銘

秦州天水郡麥積崖佛龕銘

有序

麥積崖者乃隴底之名山河西之靈岳高峯尋雲深谷
無量方之鷲鳥迹遁三禪譬彼鶴鳴虛飛六甲鳥道乍
窮羊腸或斷雲如鵬翼忽已垂天樹若桂花翻能拂日
是以飛錫遙來度杯遠至疏山鑿洞鬱為淨土拜燈王
於石室乃假馭風禮花首於山龕方資控鶴大都督李
允信者籍於宿植深悟法門乃於壁之南崖梯雲鑿道
奉為亡父造七佛龕似刻浮檀如攻水玉從容滿月照

曜青蓮影現須彌香聞忉利如斯塵野還開說法之堂
猶彼香山更對安居之刹昔者如來追福有報恩之經
菩薩去家有思親之供敢緣斯義乃作銘曰

鎮地鬱盤基乾峻極石闕十上銅梁九息百仞崖橫千
尋松直陰兔假道陽烏迴翼載輦疏山穿龕架嶺糾紛
星漢迴旋光景壁累經文龕重佛影彫輪月殿刻鏡花
堂橫鐫石壁闍鑿山梁雷秉法鼓樹積天香嗽泉珉谷
吹塵石牀集靈真館藏仙冊府芝洞秋房檀林春乳冰

谷銀沙山樓石柱異嶺共雲同風別雨冀城餘俗河西
舊風水聲幽咽山勢崢嶸法雲常住慧日無窮方域芥
盡不變天宮

終南山義谷銘

有序

周保定二年歲次壬午七月己巳朔大冢宰晉國公命
鑿石闢之谷下南山之材維公匡濟彝倫弘敷庶績燮
理餘暇披閱山經以為終南敦物日月虧蔽杕幹枯栢
椅桐梓漆年代蘊積於何不有乃謀山澤之官兼引衡

虞之匠東出藍田則控灞乘漚西連子午則據涇浮渭
派別八溪流分九谷銅梁四柱石闕雙聳青綺春門溝
渠交映綠槐秋市舟楫相通蓄之則為屯雲泄之則為
行雨青牛文梓白鶴貞松運以寘宮崇斯雲屋千櫨抗
殿龍首干雲萬頃疎苗蟬鳴再熟川后讓德山靈景從
豈知運石甘泉纔通櫟陽之殿穿渠穀水直統金墉之
城將事未勞為功實重國富人殷方傳千載因功立事
敢勒山阿銘曰

寥廓上浮崢嶸下鎮壁立千丈峯橫萬仞桂月危懸風
泉虛韻乘輿嶺阪舉鍾雲根八溪分注九谷通源北涵
桐井南浮石門模象大壯規繩百堵膠葛九成徘徊千
柱桂棟凌波栢梁乘雨疏川奠谷落實摧柯事均刊木
功侔鑿河

思舊銘有序

歲在攝提星居鶉首梁故觀寧侯蕭永卒嗚呼哀哉人
之戚也既非金石所移士之悲也寧有春秋之異高臺

已傾稷下有聞琴之泣壯士一去燕南有擊筑之悲項
羽之晨起帳中李陵之徘徊歧路韓王孫之質趙楚公
子之留秦無假窮秋於時悲矣況復魚飛武庫預有棄
甲之徵鳥伏翟泉先見橫流之兆星紀吳亡庚辰楚滅
紀侯大去鄒子無歸原隰載馳輾轉長別甲裳失矣舲
皇棄焉河傾酸棗杞梓與檣櫓俱流海淺蓬萊魚鱉與
蛟龍共盡焚香複道詎歛遊魂載酒屬車寧消愁氣芝
蘭蕭艾之秋形殊而共瘁羽毛鱗介之怨聲異而俱哀

所謂天乎乃曰蒼蒼之氣所謂地乎其實搏搏之土怨
之徒也何能感焉彫殘殺翮無所假於風飈零落春枯
不足煩於霜露幕府昔開賢俊翹首為羈終歲門人謝
馬至於東首告辭西陵長往山陽車馬望別郊門潁川
賓客遙悲松路嵇叔夜之山庭尚多楊柳王子猷之舊
徑惟餘竹林王孫葬地方為長樂之宮烈士埋魂即是
將軍之墓昔嘗歡宴風月留連追憶平生宛然心目及
乎垂翅秦川關河羈旅降乎悲谷之景實有憂生之情

美酒酌焉猶憶建鄴之水鳴琴在操終思華亭之鶴重
為此別嗚呼甚哉麟亡星落月死珠傷瓶罄壘耻芝焚
蕙歎所望鐘沉德水聲出風雲劍沒豐城氣存牛斗潛
然思舊乃作銘云

風雲上慘舟壑潛移駸駸霜露君子先危紀侯大去懷
王不返玉樹長埋風流遂遠荀伯舊縣慶封餘邑萬里
歸魂修門詎入城連武庫山枕盧龍思歸道遠返墓無
從徒留送鴈空靡長松平陵之東無復梧桐松聲蕭瑟

長起秋風疇昔隆貴提攜語默託情嵇阮風雲相得有
酒如澠終溫且克朝陽落鳳大野傷麟佳城鬱鬱流寓
于秦山陽相送唯餘故人孀機婺緯獨鶴孤鸞閨深夜
靜風高月寒生平已矣懷舊何期匣中絃絕隣人笛悲
昔為幕府今成總帷

梁東宮行雨山銘

山名行雨地異陽臺佳人無數神女羞來翠幔朝開新
粧旦起樹入牀頭花來鏡裏草綠衫同花紅面似開年

寒盡正月遊春俱除錦帔併脫紅綸天絲劇藕蝶粉多
塵橫藤礙路垂柳低人誰言洛浦一箇河神

東宮玉帳山銘

玉帳寥廓崑山抵鵲總葉成帷連珠起幕玉策難移金
花不落隱士彈琴仙人看博巖留舊鼎雲上新荆煮石
初爛燒丹欲成桑田屢變海水頻盈長聞鳳曲永聽蕭
聲

吹臺山銘

江寧吹嶺雖山出筠秦簫下鳳此岫為真青槐避日朱
少司晨石名新婦樓學仙人吳中字玉城南姓秦比花
依樹登榭要春舞能留客聲便度新彫梁數振無復輕
塵

至仁山銘

峯橫鶴嶺水學龍津瑞雲一片仙童兩人三秋雲薄九
日寒新真花暫落畫樹常春橫石臨砌飛簷枕嶺壁繞
藤苗窓銜竹影菊落秋潭桐疎寒井仁者可樂將由愛

靜

望美人山銘

藝文作徐陵
今兩存之

高唐礙雨洛浦無舟何處相望山邊一樓峯因五婦石
是三侯嶮踰地肺危陵天柱禁苑斜通春人常聚樹裏
聞歌枝中見舞恰對粧臺諸窓晝開斜看已識直喚便
迴豈同織女非秋不來

明月山銘

竹亭標嶽四面臨虛山危簷迴葉落窓疎看椽有笛對

樹無風風生石洞雲出山根霜朝唳鶴秋夜鳴猿堤梁
以堰野路疑村船橫埭下樹夾津門寧殊華蓋詎識桃
源

刀銘三首

風伯吹鑪雲師鍊冶鐵燄朝流金精夜下價重十城名
高千馬

千金穎合百鍊鋒成光連斗氣燄動山精身文水動必
古珠生

斗精遙降山靈下從水文千曲蛇鱗百重燕砥歛必蜀
水開鋒氣生分景環成屈龍

讚

自古聖帝名賢讚二十七首

黃帝見廣成子

治身紫府問政青丘龍湖鼎沒丹竈珠流疎雲即雨落
木先秋至道須極長生可求

堯登壇受圖

登壇洛汭沉玉河湄丹圖馭馬綠甲乘龜榮光上幕休
氣連帷雖存克讓於見文思

舜舞干戚

平風變律擊石來儀先齊七政更服三危朱干獨舞玉
戚空麾南風一曲拱已無為

禹渡江

三江初鑿九谷新成風飛鷁涌水起龍驚樂天知命無
待憂生危舟遂靜亂楫還平

湯解祝網

連珠兩起合玉雙沉穀為祥樹桑成樂林三方落網一面驅禽德矣聖政仁乎用心

文王見呂尚

言歸養老垂釣西川岸止磻石溪唯小船風雲未感意氣怡然有此相望于茲幾年

武丁迎傳說

虞田路斷辭澗泉飛躬勞版築有弊韋衣賢臣入夢天

賜無違千巖之下遂得同歸

成王刻桐葉封虞

虞叔百里居河之汾帝刻桐葉天書掌文禮以成德樂
以歌薰天子無戲唐其有君

漢高祖置酒沛宮

遊子思舊來歸沛宮還迎故老更召歌童雖欣入沛方
念移豐酒酣自舞先歌大風

漢武帝聚書

獻書路廣藏書柱開秦儒出谷漢簡吹灰芝泥印上玉
匣封來坐觀風俗不出蘭臺

袁盎諫文帝

千乘峻轍六轡危行跡迴松坂山叙柳城龍淵地狹華
蓋風驚賢臣攬轡可謂忠貞

朱雲折檻

上書直諫有怙明君先求斬馬遂請魚文身摧欄檻義
烈風雲應從御史翻賴將軍

周公戒伯禽

伯禽居魯鳴玉來朝周公政治為國風謠北山有梓南山有橋禮容雖備俯仰無驕

五月披裘負薪

披裘當夏俗外為心雖逢季子不拾遺金禽巢欲遠魚沉唯深清聲滅跡何必山林

王祥扣冰魚躍

王祥之母鮮鱗是求冰連釣浦凍塞寒流精誠有感無

假沉鈎二老同膳雙魚共浮

孫叔敖逢蛇

叔敖朝出容悴還家母氏顧訪知埋怪蛇爾有陰德陽
報將加終為楚相卒享榮華

高鳳好書不知流麥

高鳳好學專心不廻流連經笥對翫書臺石門雲渡銅
梁雨來麥流雖遠書卷猶開

張良遇黃石公

張良取履跪受無辭兵書一卷長者三期昔稱韓相今
為漢師穀城餘石還歸舊祠

師尚父授丹書

尚父一遇周王是親赤雀既下丹書已陳自論秉鉞長
別垂綸獨有礪石留名渭濱

榮啓期三樂

榮期三樂唯人與年夫子相遇即以為賢性靈造化風
雲自然雅琴雖古獨有鳴絃

夫子見程生

程生夫子一遇相知薄言傾蓋桑陰遂移清陽共美賢
聖同羈陳詩難別贈絹傷離

鉏魔見趙盾

趙盾將朝端衣整笏鉏魔受命衝冠怒髮惆悵賢臣顧
瞻城闕利劍不抽青槐先絕

蔡澤就唐生相

蔡澤羈旅唐生決疑無勞神策不問靈龜富貴自取年

壽須期雖云異相會待逢時

李陵蘇武別

李陵北去蘇武南旋歸驂欲動別馬將前河橋兩岸臨
路悽然故人此別知應幾年

樊噲見項王

樊噲將軍漢王車右不憚鋒刃何辭卮酒霸上屯軍鴻
門固守持謝范增唯留玉斗

秦穆王飲盜駿馬

駿馬遇盜秦王不嗔先傾美酒翻畏傷人隣兵向國窮
寇侵秦于時大盜還作功臣

延陵季子遇徐君

徐君有禮季子惟賢經過一遇如舊依然人非別後心
許生前長松雖合寶劍猶懸

鶴贊有引

武成二年春三月雙白鶴飛集上林園大將鄭偉布弋
設置並皆禽獲六翮已摧雙心俱怨相顧哀鳴孤雄先

絕孀妻向影天子愍焉信奉事階墀立使為讚

九臯遙集三山迥歸華亭別淚洛浦仙飛不防離綴先
遭合圍籠摧月羽弋碎霜衣塞傳餘號闕承舊名南遊
湘水東入遼城雲飛欲舞露落先鳴六翮摧折九門嚴
閉相顧哀鳴肝心斷絕松上長悲琴中永別

神道碑

周上柱國齊王憲神道碑

昔者軒皇受姓十有四人周室先封十有五國自爾承

基纂胄保姓受氏雖復千年一聖終是百世同宗故知
昔之東京旣稱炎漢再受今之周歷即是鄴都中興公
諱憲字毗賀突恒州武川人也晉太康之世據有黃龍
魏孝昌之初奄荒元菟太祖以百二諸侯三分天下函
谷先登鴻溝大定功業如此人臣以終公含章天挺命
世誕生降太乙之神下文昌之宿珠角擅奇山庭表德
儀範清冷風神軒舉聳動廊廟光華城闕未逾韶邇已
議論天下事人或曰是謂若木一枝旁蔭數國長河一

直自然千里風飈欲遠光景將昇後魏二年封涪城縣
開國公時年五歲也虹蜺滿野是廢當途之高鸞驚鳴
岐實始維新之命國家光宅受圖欽明秉歷大風初卷
長沙始封周元年進爵安城郡公食邑二千戶仍授使
持節驃騎大將軍開府儀同三司開府同於馬駿秩擬
六卿驃騎等於劉蒼位高三事宗子維城彼多慙色武
成二年授使持節大將軍都督益壽寧等二十四州諸
軍事益州刺史改封齊國公食邑萬戶公時年十有六

王武子以上將開府未滿立年荀中郎為十州都督才
踰弱冠方之於公已為老矣加復營丘負海齊桓公受
賑之城岷山導江漢武帝求仙之地自非名陵孤竹聲
振沉黎豈得南至穆陵西登積石幸無白虎之患寧待
黃龍之盟叩笏畏威激盧仰德生為立廟刻石頌功成
都有文翁之祀非謂生前漢陽有諸葛之碑止論身後
比之今日豈可同年而語哉保定四年與大司馬蜀國
公圍金墉城師臨洛浦則廣武營奔兵上邳山則河橋

路斷八川風俗五方名利鐵市銅街風飛塵起天和元年徵還行雍州牧公以日月之明威神其政漆沮旣從荆岐即又少陽用事路不喘牛仲秋以殷民無驚水二年拜大司馬仍理小冢宰營室殿軍器太監天官以邦國為基是司六典夏官以兵戈為主專謀七德是以器械填委旣包吳漢之功宮殿崢嶸彌壯蕭河之法時以白露涼風務閑農隙督兵三萬出自宜陽拔伏龍之城平姚萇之壘馬陵削樹魏將路窮平陰聽烏齊師其遁天

子冢弟禮絕羣公仁義所往事資道德建德元年進爵
為王仍拜大冢宰姬旦封於曲阜不廢居中劉交國於
彭陽無妨常從豈直周召二南並居師傅晉鄭兩國俱
為卿士而已哉匈奴突於武川燿火通於灞上公述職
巡御治兵索方馬邑星飛龍城月動撓留犁之酒經畧
不前失煙支之山下馬而去東隣逆命返道敗德囚箕
子於寒庫罵文王於玉門天子將有孟津之師召公獨
議公報以誕應天命克成厥勲昔者成昭起師於蜀直

問張儀晉武用兵於吳惟謀羊祜於是中軍無帥僉曰
有歸五年拜上柱國元戎東討給王鐵騎二萬先襲太
原斗建麾兵天離轉戰虎嘯風騰雲飛電掩林胡棗栗
詎得充饑晉陽荻蒿何能拒防又加王精兵六萬長圍
晉州然後六軍星陳萬騎雷動中權始及前茅已戰自
爾即為前鋒橫行入鄴觀彼車絙槐木馬驚旋濘積甲
高昆陽之城封尸塞富平之水莫不如彼建瓴同斯破
竹一朝指揮六合大定是用光昭下武翼亮中都足以

攄祖宗之宿憤解生民之怨黷方當待彼石閭部斯玉
鼓經緯天地光華日月旣而赤鳥夾日黃熊入寢實沉
無祀桑林不祭宣政元年六月二十八日薨春秋三十
有四季友之亡魯可知矣齊喪子雅姜其危哉公器宇
淹曠風神透遠璣鏡照林山河容納置樽待酌懸鐘聽
扣聲動天下光照四鄰武皇帝以介弟懿親特垂愛友
而密謀竒策加禮敬焉常謂左右曰孔子云自吾有回
門人日親其齊王之謂也用之作宰則萬方協和用之

撫軍則四表懾伏豈直臯陶為士國無不仁隨會為卿
民無羣盜愛翫書籍敦崇禮樂管絃入耳則溪谷俱調
文雅沿心則煙霞並韻養由百發落鴈吟猿應奉五行
綈綳縹帙雍容舉止抑揚談論當世以為楷模措紳以
為軌範則少有壯志頗校兵書玄水降靈穀城受策飛
風長柳月角星眉莫不吟誦在心撰成於手所著兵法
凡有五卷六韜九法不用吳起舊書三令五申無勞孫
武先誠可謂有忠孝焉有壯武焉不自驕矜謙光下物

宋人獻玉不貪為寶百成子高守仁為富不謂以信致
欺為善非樂天年不享嗚呼哀哉以某年月日葬於石
安縣洪瀆川之里原隰悽愴埋於盛德幾年丘陵搖落
蘊於才良永矣乃為銘曰

悠哉朔方逝矣窮陰山連鳥道地盡龜林重黎業大伯
翳功深胄其積德必有君臨太祖撥亂喪君有君功廻
地軸策動天文猶臨赤水尚復黃雲諸侯八百天下三
分公之挺生實惟天假翠微神降文昌星下照於四國

克於兩社舟楫江河棟梁華夏水涌詞鋒風飛文雅純
深之性地極天經忠貞之道事感百靈君親惟一臣子
惟寧忠泉出井孝笋生庭乃宰天官為國之輔是居上
將為天之柱乃聖乃神惟文惟武策高開闢威移雲雨
九宮神畧三術謨明天離轉陣月德迴兵黎陽水駭官
渡山驚冀州旣載東原底平溟波欲運弱水將危中峰
岳斷半海鵬垂鳳沉丹穴龍亡黑陂臨淄廢市東武山
移千齡萬古英聲在斯

周太子太保步陸逞神道碑

公諱逞字季明本姓陸吳郡人也君子至止旣紹虞賓
鳳凰于飛實興齊國南越使者解漢帝之衣西陵將軍
覆吳王之蓋曾祖載為宋王司馬留鎮關中赫連之亂
伏劒魏室黃河叅陵或亡追路烏江艤船更無歸迹今
為河南洛陽人也高祖冠軍將軍荊州刺史吳人有降
附者悉領為別軍自是官師擁鐸更為吳越之兵君子
習流別有樓船之陣父政驃騎大將軍儀同三司恒州

刺史中都獻公太祖扶危濟傾經綸夷阻報君之恥遠
襲平原以高平霸業所基委命留事關中餽食非直榮
陽之師河內供軍豈但洪園之竹公秉照晉之靈降明
神之德猛虎振檻七年不驚羝羊觸藩九齡能對諸兄
以公先君愛子稱之曰仁推而襲封雖復季末大成之
心守節疑有闕誤既遭燠穴翻從壓紐太祖初封函谷始合
諸侯以公詞令參謀機密故得戎政克宣師言無漏賜
姓步陸孤氏委鹿輅而論都入鴻門而舞劒方之吹律

綽有餘榮出身羽林監輕車將軍除尚書右丞官聯會
計務殷平隼水衡貫朽常平粟紅授使持節車騎大將
軍儀同三司增邑千戶尋遷駕部中大夫領吏部中大
夫歷藩部御伯東京鼎寶先加鄧隲之勲西晉官人多
用山濤之啟豈若五王登朝必司賓主之禮六龍御轡
取定鸞和之節御正以官觸父名不拜會稽有王會之
名其子不為太守博陵有王沉之封其兒不為刺史遷
驃騎大將軍開府入掌納言治司宗伯又為軍司馬職

居常伯勤問於南宮位管王言連官於北斗豈止郊天
祀地龍門嶰谷之聲贊鼓頌旗白露涼風之月閣夜有
人餉羅數十匹公閉門不受行人干觸具以聞奏朝野
稱之太尉楊震直推故吏之金涼州張奐高揖羗人之
馬清畏人知我無慙德齊國通和封人受使以公有出
境之才見命張旻之禮旣殊盤歆血定楚國之連名七
首登壇反齊人之侵地是謂使乎固稱光國三輔公侯
五陵鐘鼎桐街柳市塵起風飛乃授京兆尹增邑通前

一千六百戶餘官如故上林兵息蘭池盜靜不學王陽
平生鑄金之術未同張敞終日章臺之遊家僮暮行還
得遺錢於道并白紵十匹公訪得其主即以還之見金
於路指以示人得錢於道留持挂樹方之今日異代同
風俄遷司會治小司馬重總六軍再操八柄考績入於
歲成論功書之年表尋授都督宜州諸軍事宜州刺史
露冕觀風停車待雨百城解印憚朱穆之威千里相迎
愛王基之德曾未暮月被勅追還眷眷吏民不無河內

之請依依故老實念黎陽之別少陽養德前星守噐尊
師讓齒必俟賢能乃授太子太保方之劉寔道高於大
邦譬以山濤榮深於小輦本有消渴之疾常餌金石自
理舊疾微增庵捐館舍茂林之下不留封禪之書校尉
之營惟餘服食之噐嗚呼哀哉春秋四十有七建德二
年五月十一日也天子以大臣之喪躬輟聽訟東朝以
師傅之尊親臨攢祭詔贈大將軍謚某公禮也以今三
年正月十日塋於京兆之高陽原夫人郁久間西遇王

姬受敬肅恭言容令淑有聞歲盥無廢絃綖爰在盛年
先從大夜今節婦開墳松柏已拱季孫成寢丘陵始同
况復圖畫賢妃方在甘泉之室瘞埋才子即用高陽之
原公儀表外明風神內照器量深沉階基不測事君惟
忠事親為孝言為世範行為士則留連墳索怡悵文詞
霜府錄於尚書天官總於司會出入匡贊常帶數職身
具六龜腰恒四綬陳平密謀既非天子所見荀彧上策
又非諸侯所聞其為郡也惟取赤土封書其為州也唯

以青鹽換粟留家則千樹無資遺子則一經而已嫡子
操至性過禮純孝不遺墳前之樹染淚者先枯庭際之
禽聞悲者則下銘曰

山連日觀水枕滇機富春沙起開陽柱飛大夫屈節將
軍振威南越受吏西陵解圍昔我烈祖垂翅秦中白馬
無路烏江不通笛吟鄉里琴哀土風營州恒州擁旄世
載壯節旃鈴人雄關塞直河穿趙平雲臨代生謂立功
沒為留愛降茲岳瀆誕此貞明祥符雲氣慶合星精宮

帷定策殿柱書名忠泉暗漏孝笋寒生世屬殷周時逢
楚漢天下三分鴻溝一半以我明略來叅匡贊日乃再
中天成兩旦遞叅三事歷副六卿天司光宅地載謨明
春官定禮夏官治兵識言默識溫樹無名謙恭周密言
行無乖忠公兕殪陰德地埋軍國紛總部領瑱堦一作
馬不入廐金不入懷具瞻惟德高山惟仰甲觀初登龍
樓初上東國桓榮西京疎廣年齡俄頃風電相推銘旌
兩沒池柳雙迴煢煢肩子在疾銜哀身彰野火心懼天

雷日月其除榮終哀始馬歸司隸書還太史歷對天星
墳連地市山勢接飛松形蓋起德音無絕平原忽矣

周大將軍司馬裔神道碑

公諱裔字遵肩河內溫人也昔顓頊之命始則南正司
天重黎之後又以羲和掌歷夏陽適晉得隨會而同奔
東海避秦與毛公而俱隱其後金行受命玉筭南遷帝
系極於輿圖中朝至於江表曾祖楚之晉太傅錄尚書
揚州牧會稽文孝王之次子元顯之幼弟也元顯見害

之後桓玄篡逆之初爰自齟齬客身屠釣河內道左抱
劒長號代郡城前慟悲靈祭江淮志節之士汝潁風塵
之客感激一言咸多依附旣而雲生伏龜星出鯨魚太
白經天蚩尤映野公乃收合餘燼泣血登陴臨武牢之
關據成臯之坂擁衆萬家歸於魏室魏明元皇帝遙授
平南大將軍荊州刺史襲封瑯琊郡王尚河內公主命
王承制從賓國之儀於時宋兵憑陵旗鼓侵逼虎牢不
封金墉無援魏太武皇帝授王使持節侍中安南大將

軍開府儀同三司給前後部鼓吹元戎起行志雪冤恥
登壇慷慨三軍掩泣黃河漕粟已出石門白馬連旗將
臨野坂旣而雲中析起代郡烽燃反旆南轅途窮北略
贈征西大將軍都督梁益秦寧荆兗青豫郢洛十州諸
軍事揚州牧司徒謚貞王祖金龍封瑯琊鎮西大將軍
儀同三司吏部尚書贈司空謚康王父悅鎮南將軍豫
州刺史漁陽莊侯以荆河刺舉時值亂離釁起蕭牆遂
終非命公遺腹載誕流離寇逆復壁襁負深山擁樹程

嬰之匿趙武從役家臣王成之藏李燮為傭酒市遭太
夫人憂苦草墳塋以終灰燼形骸毀瘠逾於喪禮年十
有五始幹家事楹前鑿柱即取遺書石上開松仍求故
劍出身司徒府參軍除中堅將軍員外散騎常侍值魏
室多難所在蜂起孟津以北無復封畿嵩山以南即為
鋒鏑公建議修武立柵溫城函谷西封河橋北斷長亭
籍馬並入武城百里租車咸輸溫縣太祖文帝締構闕
都經綸夷阻招攜以禮懷遠以德馬文淵之擇主去隴

抵而歸身竇周公之入朝在河西而奉詔大統七年蒙
授平東將軍北徐州刺史十年河內故義四千餘家願
立忠誠須公衣錦乃授使持節領河內太守加前將軍
懷州拓境兩鎮奔波柳泉轉戰三城授首十三年太祖
召山東諸立義之將能率衆入關者有加重賞公率先
而至領戶千室即以為封固辭不受其菽粟之賜或以
指困馬牛之賞將同量谷朝廷以華陽西極漢水東流
歎孟達之奔兵怪劉封之失策魏前元年移鎮漢中除

白馬城主領華陽郡守昔稱導漾今聞上瀦煙沉氷井
雨歇雲門其年授大都督加散騎常侍柱國蜀國公開
金牛之道通牧馬之關公卷甲北塞懸軍東馬遂得策
預葭萌勲叅綿竹封龍門縣開國子蒲州刺史仍領新
州尋授使持節車騎大將軍儀同三司大中正隆周授
圖天保大定以公才望仍為舊臣遂乃義深追遠恩隆
繼絕即改封瑯琊縣公邑五百戶仍遷驃騎大將軍開
府儀同三司都督巴州諸軍事巴州刺史武成二年被

勅赴援信州魚復道阻屢却岑彭荆門水急幾沈吳漢
公乃月峽先登瞿唐直上天子以公操履忠勤儀刑亮
直乃徵為大御伯尋轉大御正邑一千一百戶樞機近
侍出納絲言所謂多識舊章殿中無雙者矣四年大軍
東討公所領義衆先守枳關授都督懷州諸軍事懷州
刺史偃師張幕河陽牧馬雖接戰於富平已連營於官
渡五年詔追還拜始州刺史更討信州賊山彰尋寶渝
恃險峽路五尺絙約纔通縣水三門橋飛齊渡旣而風

行草偃谷靜山空前後平十一城獲九千餘口馬歸平
樂金輸水衡天保二年除信州刺史都督信州諸軍事
朝發白帝暮宿江陵氣振巴丘之兵威警建平之戍五
年遷漳州刺史益州柱國公降帝子之重鎮天井之星
延閣擬於叢臺岷山方於代郡公仰稟雄謨參謀遠略
故得身預舞陽之功位極長平之寵六年授使持節大
將軍大都督西寧州諸軍事西寧州刺史方欲闢沫若
徼牂牁見夜郎之侯習昆彌之戰而飛鳶墮水馬援去

而無歸金馬騁光王褒行而不反嗚呼哀哉七年正月
十日薨春秋六十有五詔贈使持節大將軍懷邵汾晉
四州諸軍事懷州刺史夫人襄城公主魏獻帝之曾孫
趙穆王之季女王姬肅恭禋翟典禮四教兢莊三星令
淑有光隆慮之賢足表平陽之盛生則從夫以秩死則
同穴以禮建德元年八月十二日合葬於武功三時原
大夫墓樹以柏諸侯墳高於雉吁嗟滕公來居此里詔
謚定公禮也公資忠履孝蘊義懷仁直幹千尋澄波萬

頃逢蒙射法力牧兵書星辰高下之占風雨逢迎之氣
故得師出以律天幸將軍者也至如官曹案牘未嘗煩
壅戎馬交馳不妨餘裕足使四岳彌峻三台更明在朝
四十一年身經一百餘戰凡任四郡歷八州未嘗以貨
殖經懷去如始至渭南千畝之竹更懼盈滿池陽二頃
之田常思止足身歿之日家無餘財素車白馬狹室崎
嶇黃腸元甲堦庭仄陋有詔冬官為營寢室朱邑祭酹
無所漢后是以賜金陳表妻子露立吳王為之開館鳴

呼哀哉世子侃孝家忠國揚名顯親是以勒此豐碑懼
從陵谷植之松柏不忍凋枯銘曰

欽若厯象平秩寅賓少梁奔華地入咸秦族夷興馬書
窮獲麟玉鏡云始金行乃構象浦通闕龍沙開候上糝
石起河陽水鬪五馬南浮三星東宿太傅作牧奄有江
池司徒避亂承制荆河南勞推轂猶思枕戈龍媒被野
蒼兕凌波莊侯季年禍機相接誕公遺嗣崎嶇懷挾山
竄趙武家藏李燮伍員道阻燕丹路遙南奔楚塞北避

秦橋水流登隴寒風度遼有功都護則重嫖姚懷書上
馬習禮從戎陣圖六甲兵占八風藏松寶劍射柳琬弓
推誠賈復屈節廉公八翼頻飛六條急秉勇此仁義行
茲寬猛持印山開沈黎盜靜取甲無丘均田不井懋功
賜爵上將賞官軍中受詔塞外登壇方屠叅合更鑿臯
蘭渝川毒水燹道災氛地亡都尉灘悲使君谷寒無日
山空足雲北風吹旄秋霖泣軍遺奠雙設銘旌雨布泌
水同墳平陽合墓悲哀嗣子攀號靡訴慟甚風枝悲深

霜露自此何世從斯幾年麒麟欲鬪華表中燃地形樓
起松心蓋圓茫茫丘壠代代英賢

周柱國大將軍長孫儉神道碑

蓋聞放勛立而義和昇重華登而元凱用思皇多士旣
成西伯之功俊德克明乃定南巢之伐是知惟賢非后
弗食惟后非賢弗乂若夫君臣一德啓心沃心見之昌
寧文公矣公諱儉初名慶明恒州高陸人也北岳天孫
之星燕河帝子之國故多奇節甚茂華風高闕圖南二

王齊軫長城拔本十族分源高祖太尉北平王光輔五
君允釐百揆恒衛旣從淮沂其乂祖豹龍驤將軍恒州
刺史常山刺舉非無取代之符龍驤總戎或似乎吳之
號父馘年止弱冠榮終解印公以五常蘊智六氣資德
乘天則策馬秉靈降神則牽狼應象直心於物水火恬
然無負於天雷霆不懼富貴自取豈資唐舉之言聲名
有聞無勞李膺之識年十八解褐員外散騎侍郎尋授
輕車將軍羽林監太祖文皇帝駕馭天綱苞羅英傑選

公才德光佐中書諸葛亮之西歸玉壘成三分之業管夷吾之入仕葵丘有一匡之功天水黠羌漁陽羣盜乃遷秦州長史防城大都督封信都縣開國伯三年滑州蟻聚保鄣沉命靡旗亂轍乘冰渡河丞相大行臺授假節撫軍行滑州刺史大統元年授持節西夏州刺史加散騎常侍郅支抱馬如聞耿秉之戰單于願識似畏王商之威五年遷使持節鎮東將軍都督東北三夏諸軍事西夏州刺史增邑千戶改伯為公旣而江漢遼遠車

書寂寞蜀主的顱未出檀溪之水秦王飛雉猶向南陽
之城六年以公為使持節都督三荆二襄南雍平信江
隨郢浙十二州諸軍事荊州刺史東南道行臺僕射楚
城鄰境實有讓田吳人對營無妨贈藥部內屬城為人
所訟公遂集文武肉袒自罰兄弟不讓延壽責躬吏民
有過翁歸引咎天子異之璽書勞問贈賄加幣王人接
踵大丞相書云此之美事耳目之所未經歎賞無極故
遣專使公善於撫馭長於接引山藪無棄苞苴不行示

人赤心與人顏色盜不敢發民不忍欺至是將校耆老
於州城之南起清德之樓勒賢臣之頌杜鎮南之作牧
當世樹碑竇車騎之臨戎生年刻石方之今日彼獨何
人於時戶口日增荒萊畢墾華實紛敷黔黎茂豫但恐
衮職有闕待公而補鼎飪未和須公而正是以漢陰民
望荆南杞梓並皆上書詣關連名乞留河內之借寇恂
更慚謁帝交州之請士燮還著上表九年授車騎大將
軍儀同三司十二年除大行臺尚書仍為大丞相司馬

以公識度嚴明志節清儉遂改公名儉字慶明非關書
月詎待看碑幸得千畝不同二山無廢十三年加開府
餘官如故十四年除尚書右僕射加侍中進驃騎大將
軍居上星執法在文昌之位以公才望兼而有之十五
年更除東南道行臺僕射都督十五州諸軍事行荊州
事十六年大丞相總十六軍尅清河洛公又中分麾下
參謀幃幄高選霸僚公為長史其年加都督南道三十
六州諸軍事餘官如故南陽文學更遇王基章華袞衣

還迎郭賀昔日伐蜀之謀張儀與秦昭計合平吳之利
羊祜與晉武意同太祖始定成都即有江陵之志公密
獻其策懸符深旨糧運久積梯衝立備一戰而舉鄢郢
再戰而燒夷陵遂得席卷三荆此又公之勲也詔賞奴
婢三百口太祖與公書云由公立計果如所謀令公作
鎮江陵以安蜀地後魏二年改武川昌寧郡開國公歷
陽居民非惟景丹之封曲逆戶口豈但陳平之國其年
授大將軍太和之中曹真於府內受冊元封之末衛青

於軍中即拜公之此比綽有餘榮詔曰吳人未復須助
謀謨今使梁王兵馬受公節度三年加都督東南道五
十二州諸軍事增邑萬戶維周革命光宅欽明作貳天
官允諧邦治元年授小冢宰保定二年治蒲州刺史檢
校六防諸軍事四年治襄州仍授柱國大將軍餘官如
故秩登四岳階平六府豈不功重昭陽名高蔡賜控馭
五十州風行數千里拔園葵而去織婦無三惑而絕四
知一室之中未免虛白日膳之資三杯而已詔賜繒綵

一千段粟麥二千斛天和元年陝州刺史都督八州二十防諸軍事解荊州總管餘悉如故路出王宮城臨河曲戍清陝右高視棠陰部領宴煩晦明為疾天和四年謝病故京薨於私第春秋七十有八鑾蹕降臨軒懸輟樂九旒龍旆之錫三河騎士之送詔贈太保涼夏靈銀長原河鄯甘瓜十州諸軍事涼州刺史謚曰文公貌狀丘墟風神磊落玉山秀立喬松直上煙霞之涯際莫尋江海之波瀾不測少遭荼苦在山服終攀柏樹枯侵松獸

死盡忠事國竭力從政其門如市其心如水竒策密謀
百僚仰止忠貞亮直明王敬焉至如風后陰陽之占力
牧星辰之度魏公子之兵書李將軍之射法莫不成誦
在心取為時用居常服翫或以布被松牀盤案之間不
過桑杯石鼎遺令山陵一無所用公私贈襚並不得受
止依太祖陵側無忘事君墩等兄弟並至性善居喪號
慕墳塋奉遵遺訓是以衛青之塚仍陪漢武之陵管仲
之墳即接齊桓之墓天和六年天子以四海未寧三方

鼎峙有懷將帥之志言念封疆之臣旣畫雲臺乃題麟閣更贈公為鄆國公邑五千戶追崇列辟事極神魂再改銘旌恩隆封墓公在民留愛身後見思吉日良辰郊祠野祭儀同趙超等六百九十七人表求立廟陳請象魏有詔許焉桂棟杏梁綠墀青瑣按歌會舞鳳蓋霓裳南浦送而行雲東風飄而零雨是知漢陽郡前非徒武侯之廟臨淄城下豈徒樂公之社嗚呼哀哉乃為銘曰道鍾屯剝世屬雲雷地軸左轉天關北開容車周室繫

馬秦臺乃齊七政爰答三才烈祖燮諧九龔梁棟取才
逢獵求賢入夢匡贊官雲謀猷紀鳳律定公族珪分職
貢乃惟嗣德實秉英靈身圖斗宿面繞樞星青衿敬業
童子離經信陵虛左干木分庭忠孝純深樞機周密孔
光不言曹叅勿失溫席扇枕承顏悅膝凍浦魚驚寒林
笋出肅肅風政沉沉器局直似貞筠溫如瑞玉清不置
水明非舉燭馬願如羊金須似粟上將克昇元戎旣序
夏陽三捷夷陵一舉憑軾下齊陵江入楚鼎反厯室鐘

歸大呂六卿咸事天官是司二南作伯棠陰實治清風
有頌綠竹聞詩贈行之冊超然帝師昔侍蘭苑今陪杏
林死生契濶無違一心風雲積慘山陣連陰陵田野寂
松逕寒深夏嬰之隴橋玄之墓馬見千年車回三步左
無長樂前非武庫直望高碑增悲行路

周柱國大將軍紇干弘神道碑

公諱弘字廣略原州長城縣人也本姓田氏虞賓在位
基於揖讓之風鳳凰于飛紹於親賢之國論其繼世之

功則狄城有廟序其移家之治則長陵有碑况復高廟
上書小車而對漢主聊城祭烏長岳而驅燕將公以胎
教之月歲德在寅載誕之辰星精出昴是以月中生樹
童子知言水上浮瓜青衿不戲而受書黃石意在王者
之師揮劒白猿心存霸國之用魏永安中任子都督翻
原州城受隴西王節度於時洛邑亂離當途危逼禮樂
征伐不出於天子舉賢誅暴實在於強臣太祖文皇帝
始創霸功初勤王室秣馬蒐乘誓衆太原公仗劒轅門

粗謀當世隨何遠至實釋漢帝之憂許攸夜來即定曹
王之業永熙中奉迎魏武帝入關封鵠陰縣開國子邑
五百戶太祖以自著鐵甲賜公云天下若定還將此甲
示寡人白水良劍罷朝而贈陳寵青驪善馬廻軍而賜
李忠並經輿服足為連類大統三年轉帥都督進爵為
公十四年授使持節都督原州諸軍事原州刺史仙人
重返更入桂陽之城龍種復歸還尋白沙之路公此衣
錦鄉里榮之侍從太祖戰河橋復弘農解華山圍平沙

苑陣每有元勲常蒙別賞太祖在同州文武並集號令
云人人如紇干弘盡心天下豈不早定即授車騎大將
軍儀同三司前魏元年轉驃騎大將軍開府祈連猶遠
即受冠軍之侯沙幕未開元置長平之府梁信州刺史
蕭韶寧州刺史譙淹等猶處永安稱兵漁陽公受命中
軍迅流下瀨遂得朝發白帝暮宿江陵猿嘯不驚鷄鳴
即定西平反羌本有漁陽之勇鳳州叛氐又習仇池之
氣公推鋒直上白刃交前萬死一決凶徒多潰身被一

百餘箭傷肉破骨者九瘡馬被十槊露布申上朝廷壯
馬葛履糾糾魏有去舊之歌零露瀼瀼周受維新之命
乃進爵封鴈門郡公食邑通前二千七百戶保定元年
授使持節都督岷州諸軍事岷州刺史隴頭流水延望
秦關川上娥眉猶通蜀道公不發私書不燃官燭獸則
相負渡江蟲則相銜出境四年拜大將軍餘官如故衛
青受詔未入玉門之關竇憲當官猶在燕山之下公之
此受差無慙德渾王叛換梗我西疆巖羌首竄藩籬携

貳公受脤於社偏師遠襲揚矜龍涸繫馬甘松二十五
王靡旗亂轍七十六柵鶻奔雉竄旣蒙用命之賞乃奉
旋師之樂天和二年被使南征帶甲百萬舳舻千里江
源水起海若乘流船官之城登巢懸爨吳兵習流長驅
戰艦風灰箭火倏忽凌城公以白羽麾軍朱絲度水七
十餘日始得解衣朝廷以晉寇夏陽先通滅虢之政秦
開武遂始問吞韓之謀是以馳傳追公以為仁壽城主
齊將段孝先斛律明月出軍定隴以為宜陽之援公背

洛水而面熊山陣中軍而疎行首乘機一戰宜陽銜壁增
封五百戶進柱國大將軍司勳之冊也建德元年拜大
司空二年遷少保姬朝三列少保為前炎正五官冬官
為北頻煩寵命是謂賢能三年授使持節都督襄郢昌
豐唐蔡六州諸軍事襄州刺史江漢之間不驚雞犬樊
襄之下更多冠蓋既而三湘遼遠時遭鵬入五溪卑濕
或見鳶飛舊疾增加薨於州鎮天子畫凌烟之閣言念
舊臣出平樂之宮實思賢傳有詔贈某官禮也即以四

年四月二十五日歸葬於原州高平之鎮山屬國玄甲
輕車介士一依霍驃騎之禮衛將軍之葬嗚呼盛哉公
入仕四十五年身經一百六戰通中陷办疾甚曹叅刮
骨傅藥事多關羽而風神果勇儀表沉雄學不專經畧
觀書籍兵無師古自得縱橫青烏甲乙之占白馬星辰
之變九宮推步三門伏起天弧射法太乙營圖並皆成
誦在心若指諸掌虜青犢之兵甚有秘計燒烏巢之米
本無遺策西零賊退屈指可知南郡兵迴揄標而待常

願執金鼓而問吳王橫琱戈而返齊地有志不就忠貞
死焉世子恭等孝惟純深居喪過禮對其苦寢則梓樹
寒生聞其悲泣則巢禽夜下嗚呼哀哉乃為銘曰

天齊水合日觀山連兵強東楚地遠西燕五卿咸正三
王並賢靈龍更起燧象還燃自天之德乃祖乃父維岳
降神生申及甫北門梁棟西州雲雨勇鸞言燕城名題漢
柱公始青衿風神世載猛獸不驚家禽能對劒學千門
書觀六代有竭忠貞無違敬愛乃數軍實乃握兵謀澆

沙成壘聚石成圖風雲順逆營陣孤虛靈雨鉦鳴燿火
飛狐淮陰受冊車騎登壇公為上將有此同官下江燒
楚上地吞韓推功玉案定策珠盤天有三堦公承其命
國有六卿公從其政台曜偕輝槐庭重映匡贊七德謨
猷八柄腹滿精神心開明鏡伏波受脤樓船推轂東道
未從南征不復飲丹有井澆泉無菊功存柳林身在櫺
木移茵返塋提柩山行芻靈隴水哀挽長城山如北邙
樹似東平松門石起碑字金生眇眇山河梵梵屑子泣

血徒步奔波千里孝水先枯悲雲即起世數存歿哀榮
終始

周大將軍崔詵神道碑

公諱詵字某博陵郡安平縣人也昔者華陽之野降龍
首之神烈山之都起龜文之繇匡周則盟津有會佐夏
則龍門始鑿西遊則起家秦相東入則載世齊卿備乎
史籍可得言矣祖辨平遠將軍武邑郡守父楷散騎常
侍光祿大夫殷州刺史並厲風霜俱張鋒穎郎史疊迹

官曹凜然是謂鮑恢都官百城振懼葛豐握節京師斂
手公持稟英靈偏鍾山岳雄姿俊茂眉目踈朗觀虎於
檻齧髮不驚稱象於船勝衣能對至於拉虎羈熊摧班
碎掌忘歸繁弱落鴈吟猿故得氣蓋關中威申河外解
褐領軍府錄事轉諮議叅軍時當途失御政在權門始
論函谷之兵即起韓陵之戰太師賀拔勝作牧西荆公
為假節冠軍將軍防城都督及南陽失守卷甲奔梁樂
毅羈旅猶思燕路陳軫愴悽終戀秦聲幸值和鄰言歸

舊國授衛將軍都督封安昌縣開國子食邑三百戶弘
農克復沙苑揮鋒進爵為侯增邑并前一千一百戶信
珪則更受司勳穀璧則還輸典瑞鐵馬有河橋之戰戈
船有汾水之兵除京兆太守移民下邑未學邊韶走馬
章臺不同張敞遷帥都督持節撫軍通直散騎常侍大
都督尋遷使持節車騎大將軍儀同三司都官尚書定
州大中正五曹奏事有朱穆之忠九品論人見楊喬之
直改封安國縣侯益邑合前一千四百戶賜姓宇文改

名為訖漢王改婁敬之族事重論都魏后變程昱之名
恩深捧日遷驃騎大將軍開府儀同三司加侍中實憲
連官單于之寶鼎可致張寬固位渭橋之流星可識司
木七工既掌丘陵之賦司會六典乃均邦政之才居官
得人於斯為盛進爵為公改封萬年縣通前二千四百
戶除隴州刺史都督隴州諸軍事隴坻路遙秦川望遠
鄧仲華之不去馬文淵之願歸尋除涼州刺史總督河
西甘瓜諸軍事地似伏龍城如飛鳥燉煌實錄宛在胸

襟玉門亭障無勞圖畫有馬如羊不以入廐有金如粟
不以入懷柱國齊王今上之介弟龔行薄代問罪河陽
以公為行軍長史叅謀帷幄中軍之司既舉魏絳上卿
之佐實用荀林以公方之差無慙德除使持節大將軍
大都督崇德安義建忠九曲安樂三泉伏流周張平泉
固安蠻通谷凡十三防禦熊和中三州黃蘆起谷王晏
供超牽羊溫孤交河大嶺避雨木柵寺一十成諸軍事
崇德防主宜陽上地更有秦兵熊耳山前還逢積伏用

是連營函谷獵騎黎陽威振兩河名陵三晉改封安平
縣公淮陰一國韓信之故人戶牖萬家陳平之鄉里公
此衣錦足為連類建德四年正月十日薨於長安之永
貴里私第春秋六十有四詔贈鄜延丹綏長五州諸軍
事敷州刺史謚曰莊公禮也即以其年二月二十四日
葬於京兆平原鄉之吉遷里北陵追遠大司馬有賜綬
之恩西京贈行冠軍侯有詔葬之禮嗚呼哀哉世子儀
同弘度生事以禮死葬以禮愛親有王祥之孝同氣有

姜肱之睦百行之本於斯備焉況復松楸深沉既封青石之墓丘陵標榜須勒黃金之碑乃為銘曰

華陽之神厲山之祖鳳野匡周龍門佐禹日浴溟池山浮海浦甫穆霸國營丘樂土脩斯宗邑承此壤王移封東武就君安陽中軍節目鎮北鋒芒商飈獵草電火驅霜公之輪煥繼體楨幹儀表丘墟風神墻岸孝有至德忠能匡贊不廢橫琴無妨歌案既班三事又貳六官衛青受詔韓信登壇長城馬窟廣武兵欄軍吏無犯營民

不寒乃用六謀乃論三策城壘向背星辰主客劒起沉
犀弓開伏石楚后讓盟秦君還璧百齡危脆千仞摧滅
諸侯地裂邊將星亡輕車騎士玄甲黃腸社如齊地廟
似桐鄉銘功贊德碑闕相望

周車騎將軍賀婁公神道碑

昔者軒丘命氏初分兄弟之姓若水降居始建諸侯之
國自是以官為族因地為宗水派枝分其可知矣公諱
慈字元達本姓張清河東武城人也仕於周張仲為孝

友謀於晉張彥為賢臣韓有開地則五世強國趙有孟
談則三卿不戰祖慶少習邊將仗智勇雖復五車竹簡
不取博士之名一卷兵書即以將軍自許角端在手必
無齊魯之侵蓮花挿腰甚得蛟龍之氣為車騎大將軍
儀同三司散騎常侍霸城縣開國伯贈河州刺史父璨
公子公孫有鎡基於天下良弓良冶有世業於家風書
則百家可知劒則千人可敵三槐以鴈鼎象物知其神
姦五等以桓珪班瑞守其宮室君以才望兼而有之終

於使持節車騎大將軍儀同三司散騎常侍武定縣開
國公贈河州刺史惟公秉山岳之靈受星辰之氣年在
髫髮甫就勝衣竹馬來迎已知名於郭伋羊車在道即
見賞於王澄豈直童子明經書生說卦而已至如禪河
清論秋水高談故以辨折龜林聲馳鹿野國家官族君
為首姓起家車騎大將軍儀同三司襲爵為公增邑合
一千六百戶弱冠登朝傳呼甚寵漢魏台鼎故無此比
中朝方伯罕有其年大冢宰任總機衡是勤王略惜君

忠壯委以爪牙乃領左廂親信出為梁州防主華陽西
極漢水東流巴濮旣寧沈黎即靜保定四年王師北伐
以君驍勇被召將兵師下宜陽身登函谷將燒白馬之
城以覆烏巢之壘旣而中途甚雨未獲圍原軍師聞喪
不成侵宋柱國趙王今上之第九弟也文則河間上書
武則任城置陣作鎮岷丘揚旂錦水白虎之俗難安黃
龍之盟不定以君智略入佐中權天和元年授使持節
大都督治柱國總府司錄仍轉司馬餘官封如故相如

西喻鏤石於靈山武侯南征浮船於瀘水方之今日彼
獨何人九品課工為上之下四年入朝歸事宰旅即受
載師大夫將命齊國尋盟出境即用和鄰之儀入國聞
喪仍從會葬之禮可使南面此之謂乎尋以本官入治
軍正至如渭水兵書在心為志軒丘陣法聚石成圖既
得師不疲勞兵無怨讟入陪中禁更領儀同邸舍城池
門闌戶籍咸資巡警竝用司存帝城近臣公室密戚如
逢司隸似畏都官既而孤城鄭嫗不相其年巴水涪翁

不醫其疾春秋三十有三奄捐館舍呂子明之疾甚歎
軫吳王阮元瑜之長逝悲深魏主有詔贈某官禮也以
建德四年三月日歸葬於河州苑川郡之禁山公六郡
良家西河鼎族地壯金行人雄塞氣兵書七卷河水浮
來射法三篇天弧夜下鋒旗不息刁斗恒驚猶得馬上
讀書軍中習禮太史子義善於謀策諸葛公休長於撫
馭四代儀同三司七世河州刺史鐘鼎成列冠蓋連陰
所謂生為貴臣死為貴神者也但以遊魂久客反葬途

遠道阻山長妻孤子幼哀聲滿野愁氣連雲况復松檟
飄飄方臨武威之戍丘陵廻遠直對臨洮之城馬援亡
於武溪尸柩返於魏里梁鴻死於會計妻子歸於平陵
嗚呼哀哉崎嶇遠矣昔者繁昌祠前即有黃金之碣德
陽墓下猶傳青石之碑是謂勒功乃為銘曰

七葉佐漢五世相韓忠臣入仕孝友當官青城仙洞黃
石祠壇臺堪走馬書足廻鸞武定風颭霸城嚴肅並馳
雙傳俱分兩竹重世刺舉連鑣袞服草靡青丘風馳赤

谷世不乏賢挺茲上嗣孝有三德忠無二志劒足身挺
書堪面試旂節既秉高蟬且珥龜轉印函蛇盤綬笥左
右將軍前後常侍繼踵五侯因循三事旂旄九坂艫舳
雙流還驅木馬更引金牛江波錦落火井星浮樽酒望
帝安歌蜀侯受脤河陽偏師洛浦置陣成臯連旗廣武
朝兵減竈夜營多鼓箭起六廩鋒摧九虎候忽人世俄
然今古崇發兩星鑿驚二豎遊魂通夢言反舊塋紫泥
賜冊黃腸贈行途登石紐路入金城寒關樹直秋塞雲

平劍埋合柱書藏鑿楹武侯為廟樂公為社雲蓋低臨
霓裳紛下碑枕金龜松橫石馬永矣身世留名華夏

周上柱國宿國公河州都督普屯威神道碑

公諱威字某河南洛陽人也舊姓辛隴西人基若水之
源纂商丘之胄邑於大亳實定其居封於小辛乃成其
姓是以山川被髮辛有得見事之機八卦占爻辛廖有
知人之鑒佐治以東都上將魏帝解衣武賢以西國功
臣漢王推轂祖大汗渭州刺史考生河州四面總管大

都督隴右貴臣河西鼎族公侯踵武岳牧連鑣並得聲
振長榆名雄高柳公秉靈山岳誕載星辰結髮嶷然齟
年成德澄波萬頃建標千仞鋒穎旣高光芒已遠青衿
學劍旣為人主所稱童子論兵即在中軍之策永熙元
年入仕蒙授直盪都督太祖文皇帝雪舊君之恥連西
伯之功始裂鴻溝初登函谷公擢衣沐髮杖劍轅門撤
洗足而相迎下賓階而顧問自此即居帳內仍為直寢
授寧遠將軍羽林監白土縣開國伯邑五百戶大統元

年從迎大駕進爵為侯增邑三百戶加冠軍將軍散騎
常侍轉大都督公善於用兵長於撫馭自攻洛陽定弘
農戰河橋平沙苑冒必衝鋒前無橫陣况以弦木六鈞
函犀七屬門多懸胄箭必中鞍山積器械谷量牛馬軍
吏計功司勲賞策授使持節銀青光祿大夫進爵為公
增邑八百戶昔者受律赤符韓信當乎千里治兵白帝
張飛擬於萬人比跡今日公之謂也五年授使持節都
督揚州諸軍事揚州刺史浮於江海達於淮泗篠蕩旣

敷瑤琨即序十三年授車騎大將軍儀同三司尋遷驃騎大將軍開府仍賜姓普屯即為官族入陪武帳出總戎韜置府於陽關張旃於瀚海故得上書於漢即用同宗爭長於周還無異姓十六年授鄜州諸軍事鄜州刺史公頻領兩牧風政神明虎去西河梟移東郡河湄瑞氣特表庶平廊祀神光偏明正直及乎魏終天祿周受惟新明命已遷彝倫或革周元年改授大將軍枹罕郡開國公增邑一千戶軍中受詔非論北伐之功大將登

壇無待東歸之策置陣太平開陰晉之道連兵廣武納
滎陽之城校戰丹山移營白壁莫不勇冠三軍名凌五
將保定四年授寧州總管掌其北門旣為鄭國所委捍
其西鄙無懼秦亭之逼是以築平綱之城衛人拱手戍
滎波之澤梁氏寒心朝廷與公有內外之親令公從戚
里之貴乃以魏文帝女為公夫人遂得長門之左別開
公主之園濯龍之傍更有王姬之館五年被徵入京拜
少司馬期於司武以公為魏絳佐於中軍以公為荀首

豈直謂之鶉火稱之縉雲而已哉其年被使領兵出西
涼州奉迎突厥皇后紀制繻求卿為君逆稱族而行尊
君命也天和元年授柱國拜大司寇楚之柱國方之南
火軒之司寇譬以西雲總授於公能官人也建德二年
授少傅四年授寧州總管都督七州諸軍事即為河州
大中正公之桑梓本於此地再為連率頻仍衣錦襄城
龍種更反池臺桂陽仙人還歸鄉里故老親賓酣歌相
慶安車駟馬天下榮之宣政元年授上柱國更加少傅

配於上相即陪玄扈之圖居於京師實有杞橋之策改
封宿國公食邑并前五千戶射鴻舊圃舞鶴餘城旣浮
酸棗之河聊對淇園之竹來朝建章則天子降席出遊
戚里則群公下堦是以行滿天地名聞四海方當光輔
五君叅謀七政天厲弗戒薨於所居春秋六十有九柳
莊告殯傾社稷之臣鄭僑云亡得諸侯之禮詔贈某官
謚某公禮也以今開皇元年七月某日反葬於河州金
城郡之苑川鄉山行隴底地入塞原望積石以緣河臨

崆峒而下坂玄甲黃腸崎嶇亭鄣及云奠徹方勞榆沈
若夫樹反壤也封夏屋焉終須潁川之碑乃見華陰之
碣世子儀同永達孝性有聞居喪得禮嗟海變而田成
懼山飛而地絕勒石墓田仍銘云爾

少典之孫玄王之子虹貫於月金承於水降及於周公
侯復始風俗氣候山川表裏河連積石山帶崆峒秦亭
北上漢使西通金行氣壯地勢人雄稜稜高節凜凜踈
風祖考藩屏濁河清渭兩地謨明雙流光賁水無別色

雲無異氣為吏為民惟懷惟畏公之嗣世實秉英靈降
神中嶽迴文列星鸞翔鳳顧珠角山庭臣深義本子極
天經洛城戰陣河橋旗鼓箭飲石梁劒燃銅樹並麗六
廩俱抽雙虎玉門開郡陽關置府再為上台兩為少傅
模範帝師經綸國步允襲峻德欽明審諭不吝車茵誰
言溫樹天道茫昧年齡倏忽上將星開功臣鼎沒九原
陵阜三河甲卒地險龜林營危馬窟西州永別北闕長
辭山張虛蓋野祭空帷陵原地迥松路風悲銘於碣石

勒以貞龜

周兗州刺史廣饒公宇文公神道碑

唐朝以元凱並進十有六人周室以昭穆先封十有五
國發源纂胄葉派枝分開國承家珠聯璧合是用克明
峻德思皇多士盛德有後公其裕哉公諱常字子元豫
州滎陽人也周宣中興然後樹賢建戚鄭武有國然後
保姓受氏荆衡之賦千乘莫敢加兵虢會之封十城翻
為獻邑况復郊門致騎先迎內史之賓南宮旦朝獨識

尚書之履祖思慶建威將軍山陽太守建威取曹仁之
號可以定名山陽有王暢之賢足觀風俗考頊銀青金
紫方於溫羨傳祇鎮南征東比於劉弘荀顗報功之冊
則槐路是儀贈行之典則荆河惟牧公弱齡早慧幼學
夙成立必正方言無勦說青衿智勇即埋雲夢之蛇童
子仁心已愛中牟之雉始遊庠塾不無儒者之榮或見
兵書遂有風雲之志出忠入孝事盡於心修身立名理
窮於性大統三年起義華陽先登廣武浮潛逾汜入渭

亂河蒙授永安縣開國男輔國將軍自爾長從太祖入
為帳內都督河橋接戰秋水則三月不流洛城揮鋒金
墉則一月路斷西京不賓羌戎侵軼城如飛鳥地有伏
龍公以金僕裁抽靈鉦斲舉蜂目已奔狼心遂草遷平
東將軍帥都督十五年襲父封魏昌縣開國伯傳大都
督魏後三年授使持節車騎大將軍儀同三司黃權受
詔嘉其入魏之功竇憲當官賞其平戎之策公之此授
勲庸著矣進爵廣饒縣開國公邑五百戶保定三年授

都督羅州諸軍事羅州刺史仍領金州兵馬應接上庸
公於文谷路溪澗崢嶸巖崖豁嶮山窮水斷馬束橋飛
中埒旣開雙城即歛往者申息盡掩江黃無援潯陽極
浦亟犯風塵夏首西浮頻遭鋒鏑公以伏波受賑樓船
誓衆入橫江之陣進下瀨之兵越客文身湛盧終去吳
人長鬣餘艘遂遠建德四年授使持節開府儀同大將
軍公孫敖下光祿之塞諸葛誕勒九都之山公之處焉
差無慙德四方雜俗天下殊風以君庶能使兼觀察馳

傳擁節揚旂持斧旣乘驄馬仍被繡衣羣盜累足貴戚
斂手鄉亭留宿幸無歸忌之疑公車奏事寧有反支之
日是使陽球司隸無所申威鮑恢都官因人成士高祖
武皇帝以仲春誓衆甲子濟河公仗劔六軍披圖八陣
譬彼張遼前鋒而報魏主方之耿弇先戰而待蕭王及
乎九州道同四隩旣宅遂得功叅勇爵名入司勳授上
開府增邑五百戶加以舉功行賞推恩分邑兼乘而反
光乎譙郡之城載寶而歸照於臨漳之水即日賜姓宇

文與國同族婁敬上書於鹿輅項伯舞劍於鴻門公之
此榮足為連類以公績著屯險誠貫風霜其年授使持
節都督東徐州諸軍事徐州刺史宣政元年授都督南充
州諸軍事南充州刺史作牧濟河風行於雷澤建旗海
岱化被於淮沂襜帷入境貪殘者解印冕旒從政仁義
者郊迎豈直白石開渠青鹽換粟祥雲入境行雨隨軒
而已哉在任遘疾薨於方鎮皇甫嵩監御斯牧賢能刺
史荀中郎連率此則中興方伯英聲茂實公之有焉詔

贈某官謚某公禮也以大象二年十一月十日歸葬於
滎陽之某山舊墓九原悽愴趙文子其何言駟馬悲鳴
滕成公其已遠若夫勒鼎刊碑銘功頌德陳其令範必
在生前嗟乎此之樹碑異乎洙泗之水此之勒石異乎
燕然之山嗚呼哀哉乃為銘曰

高陽之子少典之孫蒼林遠邁若水遙源公侯復始鍾
鼎逾繁承基纂胄建國開藩我壯我武旣公旣侯緇衣
出鄭卿士歸周魚陵北上滎澤東流河移酸棗粟雨陳

留祖守南邦考鎮東部兩龜為印雙虵結綬日察陰陽
星占長柳是曰世載其名不朽事親之道孝以立身事
君之道忠以立仁今君嗣德一此君親如松之茂如竹
之筠功參荊棘職主兵戈北臨青嶺南通白波直雲橫
塞長星渡河陳開沙斷師移竈多舉功行賞封疆受位
宮室鏤珪山河分地決勝千里謀深計秘建武功成名
連星次建旗濟澤擁節龜蒙既蠶桑土實撫梧桐野無
異器河無別風吳亭楚塞莫敢彎弓倏忽身世俄然松

檣路轉銅魚山迴石馬武侯之廟樂公之社望此高碑
悽然淚下

周隴右總管長史贈少保豆盧公神道碑

君諱永恩字某昌黎徒河人本姓慕容燕文帝旣之後
也朝鮮微子之封孤竹伯夷之國漢有四城秦為一侯
其先保姓受氏初存柳城之功開國承家始靜遼陽之
亂自天市星妖連津兵覆尚書府君改姓豆盧筮仕於
魏祖代左右將軍魏文皇帝直寢父長少以雄略知名

不幸早世周朝以公兄弟佐命義存追遠保定二年有
詔贈柱國大將軍涪陵郡公是知春雨潤木自葉流根
西伯行慶推存及歿公以山岳精靈星辰秀異氣侔鍾
鼎聲感風雲觀於秦兵尚稱童子對於楚戰猶在青衿
太祖文皇帝乘時撥亂奄有霸業潁川從我舊愛無渝
春陵故人相知惟眷普泰二年關西建義授殄寇將軍
奉迎大駕賜封新興縣伯邑五百戶開新安之鄉還移
楊僕之闕解弘農之圍更入劉昆之郡援桴併轡並預

前驅大統三年有沙苑之戰四年河橋之役介冑蟻虱
戎馬生郊公靈變愈長風颭更勇隱若敵國差強人意
授龍驤將軍中散大夫八年授直寢右親信都督尋轉
大都督加通直騎散常侍十六年授使持節車騎大將
軍儀同三司魏元年授驃騎大將軍開府儀同三司鄧
騭以漢朝親戚始授中台黃權以魏國功臣初登上將
公頻煩寵授朝野為榮三年都督成州諸軍事成州刺
史尋加侍中外總連帥威振百城內叅常伯榮高八舍

於時隴坻黠羌時穿上谷榆中羣賊或聚漁陽公卷甲
星馳長驅千騎廻洛兗徒望風草靡瓜州豪傑束手歸
軍後魏元年改封龍支縣侯三年朝廷使大將安政公
隨突厥吐谷渾歸國河鄯二州屬當路首公領騎八千
以為戎防南通丹粟西望白蘭闕塞無虞公之勲也周
元年授都督鄯州諸軍事鄯州刺史其年改封沃野縣
公增邑千戶二年授隴右總管府長史武成元年都督
利涉汶三州諸軍事利州刺史五年兵破文州陽陣蠻

仍平瀘水以保定元年將兵破巴州恒獫狁度瀘五月
葛亮有深入之兵長坂九迴王遵有忠臣之路霜電不
驚水草無乏天幸將軍斯之謂矣其年授司會八法斯
掌九賦是均事總歲成功叅日要三年還授隴右總管
府長史公屢弼英蕃頻相大府北海入朝仰以對問東
平謁帝因而定禮遂使馬首懷燕不無樂毅蕃臣疑漢
或多田叔兄楚國公以叅和挹讓莊贊樂推建國開都
奄荒南服求以先封武陽郡三千戶益公沃野之封朝

廷以兄弟相讓不無前史推恩分邑有詔許焉增邑并
前合四千七百戶旣而六氣相犯五聲相觸靈壽不終
遊魂且變薨於官舍春秋五十八詔贈少保幽冀定相
等五州諸軍事幽州刺史謚曰敬公禮也天和元年二
月六日塋於咸陽洪瀆州大夫墓樹以柏諸侯墳高於
雉嗚呼哀哉公資忠履孝蘊義懷仁直幹百尋澄波千
頃留心職事愛玩圖籍官曹案牘未嘗煩委戎馬交馳
不妨餘裕兄弟公侯國朝親戚宜春有湯沐之盛濯龍

無流水之譏渭南千畝之竹尚懼盈滿咸陽二頃之田
常思止足立身則十世可宥遺子則一經而已刺史賈
逵之碑旣生金粟將軍衛青之墓方留石麟乃為銘曰
朝鮮建國孤竹為君地稱高柳山名密雲遼陽趙裂武
遂秦分竇珪世胄雕戈舊勲名稱賓賓言謂身文挺此
含章降茲岐嶷有犯無隱王道正直唯愛唯敬永成悅
色枕籍禮闈留連學殖策叅帷帳功披荆棘韓陣揮戈
齊城憑軾豹策乃建龍韜同啟校戰岐陽申威隴坻城

壘畫地山林聚米上馬諭書臨戎習禮賈復開營廉公
屈禮從容傳會占對造請用此廉平終茲寬猛綠林兵
息潢池盜靜名振赤山威高青嶺元獸浮河飛蝗出境
災氣生隴毒水侵涇朝傾地鎮夜落台星石壇承祀豐
碑頌靈渭城高柏昌陵下亭須知地市為讀山銘

周柱國大將軍大都督同州刺史爾綿永神道碑
公諱永字永賓東燕遼東郡石城縣零泉里人也本姓
段昔者昌意陵居初分若水之姓共叔出奔始有京城

之族西河居士蕃魏而却秦北岳將軍威胡而奉晉其
後居於北伐則先封遼水備乎史籍可略而言祖援鎮
西將軍馮翊太守父儒平東將軍持節恒燕朔三州諸
軍事恒州刺史公年裁弱冠即值亂離驅馳關塞之間
早有縱橫之志軍陣方圓無勞聚米山川形勢不待披
圖魏正光五年入仕解褐殿中將軍孝昌三年加龍驤
將軍永平二年授平東將軍都督中堦建義勲謀是先
蒙賞倉泉縣開國男食邑一百戶其年淮淝侵軼南鄙

徵兵公受服偏師一月三捷昔張遼奄至

有闕文

沃陽縣開國伯食邑五百戶進爵為侯永熙元年授使持節車騎大將軍左光祿魏武帝特召入任閣內大都督馬武小心侍蕭王於卧內典韋忠壯陪魏后於宮中於時賊帥元伯破掠城市西自潼函東綿鞏洛京畿大都督請士馬五千公曰此賊無他策尋為鳥散止請五百騎應手生擒朝廷賞其謀策百姓喜其除害既而喪亂弘多生民版蕩乘輿西幸宗社北遷公妙識玄象深

知歷數乃與昆弟謀為自全斬西中郎將送首關內蒙
賞昌平縣開國子食邑三百戶大統元年授使持節都
督北徐州刺史平竇軍復弘農戰沙苑河橋公並預先
登身當鋒首謨猷應變備在司勳增邑八百戶通前合
二千戶進爵為沃陽縣開國公授南汾州諸軍事南汾
州刺史十四年增邑三百戶轉大都督其年授車騎大
將軍儀同三司加散騎常侍十六年授驃騎大將軍開
府加侍中尋受恒州諸軍事恒州刺史又遷雲州刺史

昔軒丘分族異姓者十四人酆邑建侯宗盟者四十國
太祖文帝席卷關河三分天下潁川從我並有鄉里之
親新豐故人非無布衣之舊更立九十九姓還存十六
國舊胃還姓爾綿增邑一千進爵為廣城郡開國公尋
授文州諸軍事文州刺史國家以玉門西拒久勞亭鄣
陽關北牧多事風塵武成二年有詔進公都督瓜州諸
軍事瓜州刺史是以名馳梓嶺聲振榆關無雷畏威負
霜懷惠保定三年還朝授工部中大夫尋遷軍司馬夏

官司武待白露而治兵冬官考工紀玄雲而授職四年
增邑三百戶通前合三千九百戶其年授使持節大將
軍都督治左八軍總管軍事朝登上將暮會小卒事涉
交接觀豐而返天和四年以本官領小司寇三度有星
名天獄八封有坎象刑書公繁不秋荼嚴無夏日民知
約法未肯以獄吏為尊吏識刑名無敢以死灰相懼又
任左廂第三軍總管仍被勅將兵馬北道教習韓信入
關即申軍令陳農受詔仍校兵書豈直六郡良家五營

騎士懸知正正之旗遙識亭亭之氣蒙犯霜霑旗鼓驅
馳俄而遘疾疹至大漸五年六月十六日薨於賀葛城
春秋六十有八將軍死綏三軍行哭都護喪還緣邊追
祭九月二十三日靈柩至於京師皇帝臨喪百寮赴弔
詔遣使持節車騎大將軍儀同三司賀拔軌監護喪事
又遣使持節車騎大將軍儀同三司紇豆陵亮冊贈使
持節柱國大將軍同華宜鄜丹五州諸軍事同州刺史
謚曰恭公其年十一月五日葬於京城南高陽原高司

里夫人赫連氏兗州刺史悅之女年十四適爾綿氏冊
拜魯城縣君遷濟陰郡君又遷廣城國夫人肅恭令淑
儀範賢才四德有耀三星增輝三公夫人見於斯矣建
德元年十二月亡春秋五十有八二年正月歸於高司
之塋劉荊州之墓合塋於襄水之陽衛將軍之陵同穴
於廬山之下嗚呼哀哉世子岌使持節儀同大將軍領
兵部大夫純孝事親忠貞事國禮義自立聲名有焉銘
曰

軒臺受氏若水降居西城仲肩北陸寘餘山川雄烈風
俗扶疎昔我關塞沿襲干戈時遭拔本世值橫波北封
代郡東據遼河地未平一天猶薦瘥我公重光繼文踵
武總牧三蕃兼治六輔雅俗觀風都亭待雨不逢問吏
無聞桴鼓公以載世挺此令聞孝有三德忠惟一君馬
陵釋惠聊城解紛兵防滿月戰避迎雲長松都尉細柳
將軍旣牧淮海且藩恒代高壁負關長亭穿塞豐鼓司
盟關

吏不能欺兵無敢背玉關遺矩汾海留愛

大將受冊公昇其壇六卿咸事公貳其官夷陵燒楚上
黨分韓營軍叅合校戰臯蘭年深厲起福過災生上台
裂岳次將傾星赤虵悲泣白虎哀鳴懸弓靈幕繫馬寒
垌煙凝不動泉凍無聲天子愴然追於贈謚禮官賜冊
陪陵受地印綬曰策衣衾曰祔玄窆就列黃腸在位自
此何世從斯幾春樹為樨社陵成谷神詎知雲閣名在
功臣

周柱國楚國公岐州刺史慕容寧神道碑

昔在殷書懋賞周禮議勲諸侯計功大夫稱伐惟師尚
父昆吾載寶鼎之銘王命尸臣栢邑傳珣戈之賜故知
太上立德明試以功存有顯爵之榮歿有大名之貴昊
天不弔其惟楚國公乎可以旌德景鍾勒勲彝器式昭
盛美載揚洪烈者焉公諱寧字永安昌黎徒何人也都
尉總六縣之卿名山稱五岳之佐燕太祖文皇帝慕容
皝以當世英雄奄有河朔趙之南境且建王城冀之北
土仍為興國公既皝之苗裔家世燕陞高祖侍中使持

節都督中外諸軍事太保錄尚書北地王慕容超之世
蕃屏王室詳之燕錄可得稱焉曾祖尚書府君因魏室
之難改姓豆盧仍為官族祖仕魏文成皇帝考早亡朝
廷以庸勲攸屬恩深追遠保定三年有詔贈柱國將軍
少師涪陵郡開國公食邑二千戶公稟氣中和降祥川
岳岐嶷表羈貫之年通禮稱綺紈之歲夙著奇節幼表
大成兄弟分果備知推讓賓客解鈴曾無忤色永安元
年太宰朱天光魏室元輔握兵淮右抗權江南公時任

別將便從征伐自是長城峽石必先行陣秦南隴西每
當矢石摧堅乘勝莫不前驅策勲行賞常居第一永熙
元年補子都督并加鼓節軍儀除桑乾太守轉補都督
其年以魏皇西幸奉迎大駕賜封河陽縣開國伯增邑
三百戶俄遷大中大夫改伯為侯增邑合九百戶仍授
使持節都督顯州諸軍事顯州刺史四年遷鎮東將軍
金紫光祿大夫其年秋河橋之役先登破陣遷為車騎
大將軍儀同三司五年沙苑之功加封合前二千戶俄

授敷州刺史加散騎常侍外深推轂內侍集書十五年授右衛將軍十六年授大將軍後魏元年重授敷州刺史公以先經刺舉固辭不就三年改封武陽郡開國公除尚書僕射職惟贊奏任居封掌分左右之儔兼典舉之選屬以江南阻兵渚宮邊敵軍機警急鋒鏑縱橫公奉命星言元戎起路總秦人之銳士兼荆戶之廣卒水龍競雙刀之勢步騎陳四分之威夷陵旣燒黔中方定旋軍反旆解甲休兵其後鳳州內判成都外絕公又總

督衆軍蒐乘即道兵不血刃並皆擒獲遷其酋豪納其
降附皇朝受終文祖革命神宗選賢與能改絃創制爰
降冊書授公柱國增邑四千戶二年授同州刺史衿帶
關輔唇齒秦晉編戶殷積邸閭儲峙藩籬是任親賢勿
居公建旗作牧蹇帷行部六條斯舉百城咸勸三年授
公大司寇又以公勲庸特著冊封楚國公食邑一萬戶
蓋因破侯方仁等於荆陝即其地而封焉邈糾王慝弛
張刑政式遏寇虐於是御之以寬猛柔遠能邇然後平

之以冲和舜任臯陶不仁者遠晉舉隨會羣盜皆奔保定四年授岐州諸軍事岐州刺史沉洄彌留保定五年三月四日薨於私第春秋六十有二詔贈太保同鄜等十州諸軍事同州刺史謚昭公禮也十月庚申塋於洪瀆之川馳繚毀宗客車專道玄甲被屬國之兵介士陳輕車之騎克善令終生榮死感嗚呼哀哉公經德秉哲體道居貞履貴思冲居盈念損澄波千頃不能變其清濁高墻百仞無以測其汙隆立身行已居安如墜亡躬

殉義視嶮若夷至於將略應變出奇設伏太乙風角之
占常從星辰之候艘船戰陣之錄強弩馳射之書莫不
動會機神發符雷電梯衝所向地靡百樓之城長戟所
臨野闢三門之陣是以斬將奪旗四十三戰尊官厚祿
三十七年武彰七德之義謌誦九公之業迹紀庸器之
文行昭易名之典昔臧文既歿穆叔稱其立言鄭僑云
亡宣尼泣其遺愛德陽青石之墓千年未平板江白虎
之碑百代無毀敢因斯義乃作銘曰


遼水之東冀州之北旣曰都尉兼稱屬國斂氣餘勇雄
邊遺則孝實天經忠為令德冠冕世祿羽儀祚胤俗被
燕丹風慚英藺劬勞役行辛苦行陣勇過溺駿氣踰瓦
震王國克生思皇多士溫溫恭人謙謙君子擁旄仗節
出蕃入仕闕

五朝建旗千里時逢改特名載策勲淮

陰召拜昭陽破軍職司刑政獄慎深文沈羊不飲萑盜
無聞巴庸薄伐江漢專征軍總六校兵兼七營運長擊
短後實先聲增壘威敵減竈潛兵鍾鳴夜漏晞露朝陽

邑里蕭索宅帷荒涼豐碑下柩題湊遷喪宮臨櫬里臺
傾孟嘗卜兆戒期遠辰告筮德遺身後名昭歿世館舍
長捐泉扃永閉晏嬰悼齊柳莊悲衛風秋北原日沒川
逝塋田舊頃客土新封淚墮片石劒挂孤松清徽令範
千載餘蹤

漢魏六朝百三家集卷一百十一中



總校官庶吉士臣侍朝

校對官中書臣張塤

騰錄監生臣鄧肇槐